

四庫全書

集部

欽定四庫全書

集部

石倉歷代詩選卷四百九十三

詳校官右中允臣薩敏

侍讀臣孫球覆勘

總校官進士臣朱 鈐

校對官編修臣秦 泉

謄錄監生臣李世麟

欽定四庫全書

石倉歷代詩選卷四百九十一

明 曹學佺 編

明詩次集一百二十五

沈周

登照明讀書臺因訪徐辰翁丹井

遠秀目已週復騁登高足青山不嫌人所取隨我欲巍
巍古仙臺寂寂奠林麓七檜交雲霞靈飈散清馥崇臺

轉磴道攀緣把修竹同行玉堂彥高咏應虛谷逍遙東
山風能去歌管俗申紙驚連章謬圖附一軸聊以志傾
賞流傳亦何卜或恐聞邦人有酒悔無逐

題畫

山水正兼秀時秋快登臨篁筵何森邃迷誤若難尋豁
然重阿盡易厓超石林虛亭敞危構擇勝面遙岑地高
氣自爽神靜慮乃沉疎木汎清籟澄川開夕陰令我思
合江浩蕩舒素心渺渺萬里波目送雙飛禽

方道士還冶城

僧順嘗有言惠不在天上但行即須到此氣何勇壯水
雲黃冠流詩酒發清曠十年落東海故國隔西望亦云
自不歸要去誰我障配順足有餘天地納豪放今日金
昌亭風緊秋葉蕩留亦無不從去亦無所悵吸我白玉
鐘仰面月相向酣歌一掉首雲鸞渺仙仗

古木寒藤圖

古木迸石出脫葉如無生羣篠自西風何以荅秋聲蒼

藤載束縛恐因雷雨行我詩向而書誓與同老成

送歲詞

春米夜作糲送歲與俗共歲去還自來送者徒鄭重初
謂人送歲終反被歲送俛仰一歲間過眼幾悲痛

雨中看山寄楊君謙

看雨春山中晴日未可及巒華與嶺秀濯濯翠流汁水
墨間罨畫屏風四圍立雜花逗餘紅雅與松枝濕低雲
滿窻戶似愛幽人入紛紛冶遊子此景那足給山情無

愛憎佳處待人拾

憫禾

薄禾今茲計狼狽尚栖畝借問胡為爾先時已離咎五月
風雨大潢潦旱莫受田穉俯就沒濁浪扼其首排濯滴蕩
間性命存亦苟天日赫赫出水熱烹羣醜二日色已變三
日蠶在臼我時往撈觀覲活從中剖心存根已撥欲棄難
解手握土室滲膝倩車仰鄰佑督庠靡日夜救死豈容久
併力役老少足覲筋亦糾一一補傷爛行行十八九過時

強經營安望如常茂七月尋遭風弱本被拘揉折處氣當沮
虛房但含滫間或見成穗禿耜卧敗簞何能畢公租亦莫穀
饑口對此發長咨細雨淡昏西枵腹不堪鼓併欲歌止酒

春草

春草不間生千里無絕岐客子畏遠行見草愁復滋草
莫為愁生却被愁相累如何踏青人晴芳媚珠翠

西山送蔡

早行度西嶺野色莽四顧天氣亦蒼茫前岐欲迷誤狼

藉亂石間雪迹尚寒
沍危峯掛落月初日未出
樹飛旒引輜車迤迤從西
驚匍匐會葬人越邑多親
故送死還弔生相循等朝
暮知生不可持頃暫聊為
寓

畊樂

良家無外慕躬畊脩隱德
庚庚東西畝宜禾更宜麥
迹勞不自悔志靜乃云適
茨茆荆溪澣清幽多水石
西挹銅官秀右匯太湖碧
林春鳥雀鳴鄰並戒作息
和風拂田稗蕊蕊行復粒
兒孫候歸來竹戶燈火夕
引觴漫霑

醉偃息就北壁所得還自賀不敢忘帝力

題畫

層岑交亂雲歷歷映羣樹雲山互相依青白媚朝暮下
有土著者靜居氣鬱聚脩松蔭高宇細草被紆路幽深
與世違時復通杖屨鳴禽值客來語歇客還去天機發
所樂漠然非人故

思遠

露下芳草歇寒氣薄重幃幽處心獨驚行念君子衣君

予別既久嗣音亦已稀愁來不成織空對流黃機揮淚
如泉水明燭無光輝

別岩天道院

琳館愜清賞樓居俯城陰高竹間喬柯幽然自山林我
本草澤士不諧市俗心能來豈為招忽去亦莫尋翩翩
拂雙袖孤雲渺秋岑

黃墳上草

黃黃墳上草青青復回春草死有生日土中無起人人

心期百年誰存百年身有酒且為樂我愛劉伯倫伯倫亦已矣無酒澆其墳

門前有垂楊

門前有垂楊枝葉何靡靡飄花乍及地忽復因風起搖蕩少婦心天涯念遊子愁多肌肉消不敢臨流水

湖上雜言

縱目極遐曠水嬉湖中央青山載白波上下相低昂俯首愛雲霞零亂隨蘭漿悠悠遡空冥忽忽超景光宛宛

漢臯女落鴈懸微茫可望不可即相思如水長

百花洲效岑參

長濠春來水如油吳王昔日百花洲
水流花謝三千秋古人行樂今人愁
沉沉細雨停孤舟岸上人家燈滿樓
紅簾火影照中流還聞吹簫樓上頭
客夢不熟翻黃紬翻黃紬夜悠悠
拂吳鉤賦遠遊

題杜東原先生雨景

老原作畫墨法熟紙上沉沉發濃綠
重林濕葉欲垂地

合礪流淙似鳴玉廬山九疊翠不乾秋影平吞此長幅
借看寧防雨拂面要為時人洗雙目滕王珠簾正堪卷
董家破屋不可宿出門一笑青天高猶怪春泥汙吾足

西山有虎行

西山人家傍山住唱歌採茶上山去下山日落仍唱歌
路黑林深無別慮今年虎多令人憂遶山搏人茶不收
墻東小女膏血流村南老翁空髑髏官司射虎差弓手
自隱山家索雞酒明朝入城去報官虎畏相公今避走

題林和靖手帖用東坡韻

我愛翁書得瘦硬雲腴濯盡西湖綠西臺少肉是真評
數行清瑩含冰玉宛然風節溢其間此字此翁俱絕俗
開緘見字即見翁五百年來如轉燭水邊孤墳我曾拜
土冷烟荒骨難肉當時州吏歲勞問于今祀典誰登錄
我歌湖山翁不知春晚鳴鳩叫深竹歸來把酒弔雙緘
猶勝無錢對寒菊

慶雲菴月下觀杏花

杏花初開紅滿城我眠僧房聞雨聲侵朝急起攬晴艷
對房雨株令眼明還宜夜坐了餘興靜免蜂蝶來紛爭
嫣然紅粉本富貴更借月露添妍清青蘋流水未足擬
金蓮影度雙娉婷庭空月悄花不語但覺風過微香生
老僧看慣不為意却愛小紙牋脂縈高齋四壁可長有
不由零落愁人情

落花詞

山花雨中開復向雨中落昨日芳菲今寂寞紅英紫亂

滿牆頭我惜餘香留小酌君不見眼前恩怨翻覆間併
為人情嘆輕薄

漁舟晚釣圖

新豐酒波堪濯足塵土紅汙酒波綠粗豪飲客下馬來
三觥五觥行促促何如並著春江船蒲葦紫立柳黃眠
船頭對坐盃漫傳賣魚儘可供酒錢夕陽射眼拉柁轉
江光貼天孤鳥遠

新燕

今朝見新燕猶似去年見主人頭髮白轉多只有烏衣
不曾變年去年來不差分明記得主人家柴門大開
風滿屋飛出飛入隨楊花君不見相國門前車馬塞一
朝去相車馬寂車馬寂草萋萋燕子還來梁上栖

屈叟

老人僑住鳳城邊黃金遶身方少年臨街高樓尺五天
落絮遊絲縈管絃冶郎俠客來翩翩樓中無日無華筵
權門迹熟不須刺貂璫與進人尤憐看花南市春酒醺

走馬酣歸遺寶鞭青春豈許黃金鑄鴨城歸老今沒錢
屋資無告故人散草中五畝愁荒烟面廬骨立牙齒脫
短褐曼胡管屨穿逢人欲歌豪或在聲吞苦淚秋風前
老人勿悲此世態富貴貧賤本相縣薄徒勉強狙勢物
聚散茫茫雲霎然但願老人有錢復年少此輩明朝還
拍肩

題畫卷

吳之為國水所涵有山平行無巉巖我家多水少山處

悵望翠微心所貪時能借墨補不足數紙連絡長畚粘
峯巒重復間溪澗雜樹列布多楓栂或開大壑浸山足
其樹半為浮雲含僧廬隱映遠水杪平圯道谷出水南
東村西落互親友畊田鑿井同丁男便須芒履與藤杖
聽泉採藥我亦堪陽岡亭館誰擇勝雅許酒會并碁談
嘗聞巴蜀天下險未可一往尋鳬蠶子長之興浩不淺
感此老鬢霜鬢聊因此圖畫所見卧遊日日已自甘

光福

羣山西奔駐湖尾通川夾山三十里川窮小潞開鏡光
居民次水屋比比屋上有山屋下水開門波光眼如洗
虎山橋畔晚市忙打鼓漁郎賣鮮鯉霜前橘柚萬苞黃
雨後楊梅千樹紫山圍水抱開農桑樂土風光真畫裏
三年潢潦我無家恨不移書亦居此

史明古見訪

春來開門見新燕故人春來亦相見燕子不肯嫌貧家
破屋還勞故人睠燒燈屋下照白鬚高談雄辯如壯夫

且言老境知已少感慨滿懷人事殊常當有酒開口笑
君來我往亦須要願從君言不敢違肯作伯勞東飛燕

流波館為史德徵賦

鶯湖南派分兩灤翠阜浸波雙朶落沙鷗渚鶯雪點鏡
楊柳芙蓉錦開幕水心有屋駕虛明柱插玻璃高借脚
上留竹榻枕秋眠下許漁舟帶烟泊不須擇勝日移亭
何數倚晴偏快閣無地樓臺笑語涼倒天星斗魚龍躍
門前萬頃不入稅寸金寸土卑城郭紅闌我擬一臨流

但怯鬚眉老非昨

經尚湖望虞山

日午放船湖上頭
虞山隨船走不休
高峯仰見出翠壁
飛影下接滄波流
青林人家隱山麓
雞鳴犬吠聞中洲
鷓鴣羣栖竹葉暗
蜻蜓特立荷花秋
蓮歌漁唱尚互答
落影在樹猶堪遊
小舟爭渡各先去
獨逆風波渾不憂
芙蓉幃子

江天草木搖秋風
老夫滿眼悲孤紅
主人園林惜無地

夕陽野岸隨西東脉脉紅顏傷命薄露冷羅單倚高閣
隔水微辭不可通滿把瑤芳竟誰託顧影低頭思悄然
靜留明月伴嬋娟嬋娟有時亦消歇難保佳人長少年

虎丘東院送笋

我來虎丘笋未茁一住三日濕且熱夜來大雨忽浪浪
滿地棚兒思可掘東院老僧知我饒十輩橫筐露泥跋
玉癭流乳詫新鮮性命生從鎌下絕佛徒心腸本慈愛
曲徇人情充老饕刷鍋爛煮和酒嚼一笑不知誰作孽

山林君子要養成還自老夫歌勿伐

江南春和倪雲林先生四首

燕口滋泥迸么筍東風力汰倡條靜烘窻曉日開眼光
湘皮披奩尋紙影落花悠悠碧泉冷餘香猶熱臘脂井
樓頭少婦泣羅巾浪子馬蹄飛軟塵

青筐攔街賤櫻笋城外冶遊城裏靜暖風夾路傳酒香
白日連歌踏花影醉歸掉臂紫袷冷喝采攤錢喧市井
家人苦費泣羅巾拔賣寶釵吹陌塵

蒲葦破碧共如笋，妥烟楊柳金塘靜。
水邊樓上多麗人，半揭朱簾露花影。
禁烟閣雨東風冷，喚玉澆桃汲銀井。
不知飛鳥銜紅巾，嘆息殘香栖路塵。

脫巢乳燕拳高笋，小隊尋芳破春靜。
牆東笑語不見人，花枝擘撥鞦韆影。
飛籌促觥玉兕冷，殺釘簇奩珍井井。
歸程趁馬拾醉巾，洗面明朝紅滿塵。

竹堂寺與李敬數楊啟同觀梅

竹堂梅花一千樹，晴雪堆屏無入處。
秋官黃門兩詩客，

珂馬西來為花駐老翁攜酒亦偶同爵慈含香各搜句
吉祥牡丹清莫兼定惠海棠幽亦未只憑坡口詫繁華
似恐同花不同趣酒酣塗組作橫斜筆下珠光濕春露
只恐此紙捲春去明日重尋花在地

盒子會詞

南京舊院有色業俱優者或二十三十姓結為手
怕姊妹每上節以春檠巧具殼核相賽名盒子會
凡得奇品為勝輸者罰酒酌勝者中有所私亦來

挾金助會厭厭夜飲彌月而止席間設燈張樂各
出其技能賦此以識京城樂事也

平樂燈宵鬧如沸燈火烘春笑聲內盒匾來往鬪芳鄰
手帕綢繆通姊妹東家西家百絡盛裝殺釘核春滿繁
豹胎間挾鯉冰脆烏攬分剗柳玉生不論多同較奇有
品裏輸無例陪酒呈絲逞竹會心歡裒鈔裨金走情友
闌堂彌月自春風酒香人語百花中一般桃李三千戶
亦有愁人隔牆住

題小景

江山入吾興隨筆散清華
峯影分斜日波容映落霞
無橋通市迹有樹隱人家
此地如堪買分畦擬種瓜

溪上獨坐

觀生吾自得飽飯荷農功
盤石箕雙足清流影一翁
松喬藤輔友楓老葉還童
好在尋詩地無人杖屨同

題畫

山家自烟火杳杳離人羣
岩樹落紅雨石窻生白雲
朋

從因偶過世事得新聞
逐逐班然牧幽踪不欲分

見別者

出門多路歧
卮酒安足辭
難捨舊親戚
莫悲生別離
指行山水遠
愁到歲年遲
始是去家日
復成千萬思

寄松江王公佩

鶴城王錄事
不見廿經秋
看竹仍青眼
耽詩已白頭
流鶯對丸藥
野馬畏閑樓
近况逢人說
空令感舊遊

瓶梅

銅瓶倚玉枝
髣几獨看時
折樹多可惜
臨窻少不宜
斷根聊活計
勺水小恩私
省得溪橋外
追尋老步遲

晚步

西林聊獨步
樹樹已栖鴉
童笈歸村校
漁船聚酒家
玉痕雲映月
紅縵水明霞
此景偏留戀
衰年類日斜

晚坐

春殘尚絮袍
林屋氣蕭騷
白日若不夜
人生亦太勞
泥花方失勢
雨笋漫爭高
小酌仍觀物
新醅愜老饕

寄錢允言

雖是經年別尋常見好詩湖南與湖北相望即相思楊柳青霞館芙蓉碧玉池乾坤知佚老微咏閒清卮

宜閒

黃塵不是海特地為人深浮世有窮日勞生無止心從容一樽酒蕭散五絃琴會得其中趣悠悠萬慮沉

東老朱廷美號

東老老而貧惟於一影親布衾身後襪茅屋病中人白

髮偏相信黃金卻不仁閭門是居第富貴任比鄰

元日二首

物華初煥發鄙抱亦生春開歲始今日長鄉無幾人蟻
醅浮甕冽雞彩映門新笑進三分盞聊娛八十親

賀旦怡隨俗筋衰拜莫便鬢毛關燕次歷紀曠生年地
氣通葵早晴光入戶妍小孫看滿抱不待衆人憐

清溪小隱

結廬城郭遠靜勝此溪邊鷗鷺分家住烟波入枕眠釣

魚償酒券掘藕補傭錢只隔斜陽岸經遊須倩船

病起試酌

山尊得酒且高歌百歲流光已半過病眼看書真處少
老懷追事謬時多髮隨落葉驚西暎門對清江惜逝波
今古英雄同一盡浮生不飲復如何

喜標弟開館

家庭人靜日遲遲簡束青衿漸有規小子方能識痴叔
抗顏真去作人師床頭把卷書魚走窻下開絃野鶴窺

訓詁有餘仍自學知君況是少年時

寄久客

封書斷絕身漂泊別日慈親鬢已華
馬上何時少鄉使門前滿眼是天涯
客襟合有忘歸草閨燭應無報喜花
盡說杜鵑聲最切若教聞得定思家

懷西草堂

堂在懷西黃草茨吳鄉莫把蜀鄉疑
地從杜甫名全借圖為盧鴻我不辭
衣桁夕陽迷翡翠竹坪春水下鷗鷀

百壺自醉蘇司業未解求人為酒貨

病中夜雨起坐

藥盃香炷與溫存養病功夫要閉門布被擁寒書作枕
紙窗催曙水臨軒楓生赧色知霜辱蕉負爭心共雨喧
物性人情靜觀得得來還欲費吾言

六十一歲自壽

重逢丁未開新甲過六十年增一年壽是倘來那必得
人於末節要求全占鳩挾婦傷今日羨鶴添孫欠此緣

萬事莫論吾母健進將春酒北堂前

送都元敬赴史西村家塾

黃溪雪後爛生光
童冠迎船青佩長
客子能行秘書監
東家好是鄭公鄉
春帷開讀禽魚動
夜觀鳴絃水月蒼
賓主閒時還倡和
吳江滿地錄新章

西川次吳匏菴韻

移家忽要離川東
自信何須賣卜翁
七水大都如屋下
一山剛半入城中
沙鮮近市枰多蛤
海氣通村井或虹

有片閒心無所作畫圖詩律兩爭工

西川風物新家處一畝之居半畝苔慮怕市喧忙避去
便宜山近特移來芙蓉曲渚秋風動鴈驚長波夕照開
我亦曾尋偏記得隔林高有古書臺

雪中偶題

靜坐關門意始欣老年真欲息勞筋潮通沙渚冰魚子
竹亞寒簷雪雀羣畏酒作痰如惡客逢人說夢亦奇聞
紙窻飯後何消遣呵筆時抄玉露文

與客夜坐

兩年方始一相逢偶集飛鴻雪後踪清話更添新繾綣
老身全比舊龍鍾弱雲弄月微分影細草闌春暗轉容
不復舉盃成兀對薰爐頻喚小奚供

理墳

官竹園頭春日斜手開新土漸成窪觀生如寄誰非客
信死為歸此是家白髮暫存知電露青山長卧有烟霞
慰勞有假閒詩酒且弄年華與物華

橋東

老年踪跡寄橋東，問訊何勞錦里翁。
剪取竹竿漁具足，撥開荷葉酒船通。
獨臨秋水杯搖月，漫送清歌樹引風。
常笑西鄰憂不足，白頭心事竟誰同。

雪中登虎丘

月色風光知幾到，好奇今補雪中緣。
急排巖樹開高閣，生怕溪山合遠天。
城郭萬家羣玉府，塔簷千溜半空泉。
香茶美酒相酬酢，似此登臨亦可傳。

覺老

腕隔生痰謝酒觴菜羹麥飴且家常山追舊眺今成嬾
事喜新聞背已忘春水試竿魚檻淨午風丸藥烏窻涼
祇須如此成消遣種種塵緣與老妨

水村圖

魚庄蟹舍一叢叢湖上成村似畫中互渚斷沙橋自貫
輕鷗遠水地俱空船迷楊柳人依綠燈隔蒹葭火映紅
全與吾家風致合草堂曾有此愚翁

咏簾

誰放春雲下曲瓊一重差隔萬重情珠光蕩日花如夢
瑣影通風笑有聲外面令人倍惆悵裏邊容眼自分明
知無緣分難輕入敢與楊花燕子爭

挽范老

雙目冥冥與氣沉有何牽掛子孫心解驂隨補無從淚
就布聊為不足余破屋秋風茅把盡孤墳落日水聲深
老奴封土辭歸後安得松楸老樹林

病中

抱疴門戶悶常關
况是湖田粒食艱
情與歲流人覺老
事緣生累日無閒
紙窗月影虛搖竹
溪閣簾光遠見山
聊爾盤桓聊爾樂
長吟兀兀自開顏

病起

筋力遲遲百嬾成
關門只好謝逢迎
老空求舊無同輩
拙不宜時讓後生
久坐衣裳知晚露
獨眠衾枕厭秋更
祇餘曝背兼捫虱
黃草簷頭覺稱情

題畫

嫩黃楊柳未藏鴉
隔岸紅桃半著花
開眼闌干接平楚
夾洲亭館踈長沙
悠悠魚泳知人樂
故故鷗飛照鬢華
如此風光真入畫
自然吾亦愛吾家

屈老

長帽西風滿面塵
相逢憐老不憐貧
三盃濁酒浮生事
一曲悲歌萬感人
螻蟻未知何處骨
蜉蝣聊寄不訾身
白頭對落無聊賴
還說鶯花少日春

和嘉本初夜泊楓橋韻

風流張繼憶當年一夜留題百世傳
橋帶人家斜傍寺月籠沙水淡生烟
火知漁子仍村外舟載詩僧是客邊
我愧不能同此宿却拈殘韻偶成篇

生朝自遣

門前客到鶴先鳴洒掃茅堂作送迎
座舉龍鍾先有我鄉尋齊革漸無兄
明年七十誰能健今日三盃見在生
一幅布巾藤作杖倩誰林下畫閨行

新栽牡丹開遲有作

爛熳東林醉牡丹也持盃酒待花看却疑為殿非爭伐
亦料終開底作難貴介莫遊容地僻美人初聘怯家寒
我無羯鼓相催發祇撚吟髭日凭闌

病中

白木匡床草薦柔坐深無寐獨搔頭明河轉影天低樹
清夜分更月過樓病骨瘦餘光太露老懷虛甚夢禁秋
世情未了微軀了生已知浮死識休

和桑民懌七夕留題韻

銀漢剛風擘九旗
痴牛騃女是佳期
靈禽隔水先為役
蟠子緣槃已及時
清露襲衣秋沁沁
疎星垂酒夜離離
若言拙者能求巧
老我冥然却不知

閒居

顛毛脫盡野僧如
世好都歸一嬾除
欲博晏眠高着枕
圖便老眼大抄書
屋須矮小茅茨厚
窗要清虛竹影疎
心與陶翁有相得
時歌吾亦愛吾廬

答徐友送菊

爛漫移來露未乾，見花應念種時難。
還勞酒榼相兼送，已免家人別借看。
秋正寂寥偏刺眼，老堪聊賴重憑闌。
太平樂事還容我，待到春時要牡丹。

三宿虎丘松巢

舟行繫纜在溪磯，入寺登登曲逕微。
孤塔白雲平鳥背，疎林黃葉映僧衣。
臨池弔劍寒泉在，捫石尋題古刻稀。
便欲留詩補三過，眼前燈影不成輝。

陸翁贈簫枝

一筇蒼竹歲寒條十節中通亦當簫使我弄秋唇有賴
累君歸夜手無聊星含古竅聲猶滑霞清長莖色未消
老甚出遊今得力坐吹明月廣陵橋

西園為曹時修作

為園多半似遊嬉傍宅西邊事事宜
條尾趨花溪宛轉鶯聲隔葉樹參差
地循五畝橫分畛路繞三叉曲作籬
滿面夕陽人已醉還歌飛蓋舊遊時

湖南草堂為慈谿張廷儀賦

清勝之居不可當詩書亦許帶農桑近家湖似君王賜
買屋肯非錄事將山有一屏華翡翠人無半唾辱滄浪
開門儘得臨流興何事蘭亭始可觴

與徐生談顧大理老懷

桑梓歸時異去時帶金銷盡酒家肯吁嗟富貴驚塵夢
收拾功名入鬢絲後事嘆無優孟托老懷悲有使君知
尋常門巷槐花雨點筆時題感興詩

楚江秋曉卷

天連湘漢水悠悠
水色微茫接素秋
殘月已沉三國恨
亂雲初散九疑愁
南方流落身將老
西候蕭條客倦遊
欲採蘋花恨無伴
美人迢遞隔滄洲

秋夜

白屋衡門擁墮樵
秋懷落落夜寥寥
人間篋笥悲紈扇
天上樓臺款玉簫
竹實未生岐鳳老
蕉書不展塞鴻遙
青春雖在潘郎鬢
只恐愁多亦易凋

從軍行

馬上黃沙拂面行漢家何日不勞兵匈奴久自忘甥舅
僕射今誰托父兄雲外旌旗婆勒渡月中刁斗受降城
左賢早待長繩縛莫遣論功白髮生

送吳女歸徐氏

紅車綠幃及春明六禮周時汝好行銅鏡試粧花髻拙
布衣隨嫁竹箱輕繁絲緩柱房中樂細膾深盃堂上羹
婦道從今須孝順思家何必淚盈盈

贈少年

富有時名動兩都風情渾不帶豪麗平酬夜枕金條脫
寬約春袍玉轆轤走馬慣尋楊柳折下樓酣倩海棠扶
近來薛儂憑誰責可信馮生毀券無

戲友人尋訪不出

兩山不見雲遮眼一犬獨鳴花逸隣敢去揮毫題午字
慚將握髮望時人墻匡寂寂高槐雨門巷青青細草春
知子南還偏有興扁舟斜日弄芳蘋

溪翁

參差榆柳逼門前，不剪茅茨不斷椽。
歲晏雞豚鄰社鼓，秋深蝦蟹水鄉船。
會羞蓴菜量加糝，嗔拗荷花誤結蓮。
昨日逢渠溪漲後，別無言語只憂田。

葛惟善嘗托人求虎跑泉詩，附贈潘谷墨銅雀硯，墨既不至，硯亦云碎，因謝此。

慚愧高懷記項斯，開緘空感十年私。
墨亡潘谷烟澌外，硯破銅臺瓦裂時。
馬德未忘千里惠，虎泉終補一篇詩。

何當握手吳門笑共付浮沉與不知

贈徐遵誨和劉邦彥韻

祖宗原自有高勲少小豪雄貌冠軍竹裏行厨青玉案
酒邊官妓茜紅裙洛陽紙貴三都出夔府沙平八陣分
頭白歸來惟感慨却慚多病負明君

病懷

哀遲宜靜不宜譁事莫堪懷動嘆嗟病遣稭書還藉眼
老便飭粥又妨牙栽花賃地春無主斫筍開門月過家

任是客來難強酒小陪清話一澆茶

宿劉邦彥竹東別墅

乍認東庄路不真有橋通市却無鄰山窮借看堂中畫
花盡來尋竹主人爛漫箋麻發新興留連櫻筍送殘春
與君再見當經歲分付清觴緩緩巡

暮春登虎丘

獨信微吟人不知山花滿地悔來遲久搯綠樹陰中杖
仰辯丹崖缺處詩日有閒緣遊始勝老無健步出非宜

一迴到此一迴少怕近清泉見鬢絲

和鎮古田韻

昨晚溪頭月色纖老僧相見且和南箕春已及一百五
問老今慙七十三桑戶日長蠶足食竹堂風暖燕交談
茶麤酒濁無清供奇石銅槩也自堪

白燕

舊巷蕭條改觀餘小巢春暖抱雲居象推京氏原占易
飛學中郎始變書兩股尾銀青草短一痕衣雪瑣窻虛

要看柳碧桃紅處點破繁華畫不如

宿城西懷冷菴

水宿其如夜思何霜風拂鬢影瞢瞢語喧盃酒商船近
人映樓臺市火多川上微波搖映月城頭高樹掛明河
新篇在稿思君教無那無眠只漫哦

臘月二十八日立春得雨病起漫言

小閣櫺窗風自推手添香炷撥爐灰殘年送病詩中去
淑氣將春雨裏回午案待嘗新茁韭陽簷思訪欲開梅

歲功代謝忙如許似與衰翁送老來

次鮑菴雨中留宿

野水浮雲蕩夕光仙舟兩宿石溪傍清篇感舊頻翻韻
濁酒謀隣載過墻燭跋不知春夜久雨聲如為故人長
衛家剪韭今傳美他日寧無有竹庄

遊西菴

尋僧雖愛茗盃清也要提携濁酒罌野色迎人過橋去
春風吹面傍花行殷遊未及牛羊晚欣喜還隨鳥雀晴

白髮老翁身健在不憂無地慶餘生

郭璞墓

江水茫茫豈可居先生埋骨定何如日中數莫遜兵解
世上人猶信墓書漂石龍涎春霧後交沙鳥跡晚潮餘
祇憐玉立三峯好浮弄江心月色虛

月夕汲虎丘第三泉煮茶坐松下清啜

夜扣僧房覓磻腴山童道我各村沽未傳盧氏煎茶法
先執蘇公調水符石鼎拂風憐碧縐磁甌盛月看金鋪

細吟滿啜長松下若使無詩味亦枯

過席心齋道士墓

丘墟寂寂臨川上桑海茫茫感蛻餘
舊用衆盤靈霹靂新來劍地入耰鋤
羽人欲化楓株老仙鶴無言石表虛
我願追求金薤葉碧苔狼藉漫蟲書

馬秋官課農山庄

秋官臺笠事東菑雖愛清幽也似痴
分肉戲專鄰叟社訟田閒剖野人
詞竹枝雨暗蠨蛸戶豈葉風涼絡緯
籬

知遣床頭三百甕醉中都賦勸農詩

秋雨偶書

雲暗湖村水漫沙秋堂蕭颯類僧家聰明比舊堂堂減
老嬾隨年數數加風扇未愁蕉破葉雨房偏恐稻傷花
坐深兀兀多資睡強欲開書候日華

咏破蕉

翻手青青覆手黃也隨人事作炎涼臨闌默默低頭月
滿眼蕭蕭敗興霜舞袖郎當官妓老田衣顛倒病僧狂

明年看受春風寵
醉墨重題展賀章

拂水崖

只有看山是勝緣
青鞋布襪且輕便
天收雨脚賒今日
我趁花時遣老年
絕壁雲扶將墮石
豁厓風勒下奔泉
比來不慣空歸去
旋構新篇揀竹鐫

寄桑通判

驅馳一倅厭如仇
歸就高閒未白頭
竹籬理詩春草亂
糟床聽酒夜泉流
農桑舊課今家事
山水清談昔宦遊

因愛兩湖風月好近時知買木蘭舟

慰魏公美病懷

蕭齋無事掩雲蘿習靜工夫是養疴向日吟哦今健否
近來眠食定如何尋芝曉杖園頭少聽雨秋懷枕上多
我亦衰遲問候寄詩聊當一經過

黃尚節靜逸堂

記得君家附郭居一堂幽處市聲虛綠陰日薄停琴坐
白髮風涼帶雪梳螭脚漫延窓下酒燕泥時汚手中書

長郎日以文為業潤筆青錢可饌魚

遊高道禪居

山復岡迴靜結廬林蹊生處我來初杖欺新綠苔痕裏
屐賤殘紅雨迹餘酒榼臨春聊遣撥禪單消日自清虛
壁塵怪是遊題滿教種芭蕉別倩書

金陵約史明古不至

仙舟望不到玄都近信虛傳過太湖如此江山空舊約
可勝風雨有長途燈前白髮暮聲在地上碧桃花事無

春已闌珊人尚遠幽禽何苦喚提壺

竹庄賞月

爛擁銀盤草屋東白頭相賞兩三翁
青天不老人自老
明月正中秋亦中怪底有娥因藥誤
謀諸無婦恐尊空
百年各願身強健此夜年年此會同

送門神

抱關憔悴兩疲兵衆欲麾之我漫榮
歎爾功名惟故紙
傍誰門戶有長情
戟悲雨迹銷殘
畫鏐賴蟲絲戀絕纓

莫向新郎訴恩怨
明年今夜自分明

漁村

吳江本澤國
漁戶小成村
楓葉點秋屋
蘆花拍夜門
都無三姓住
漫可十家存
熟酒呼兒女
分魚喧弟昆
不憂風雨橫
惟憚水衡煩
鷗趣撐舟尾
蟹行穿壁根
怡然樂生聚
業外復何言

題畫

高春暝色動
北垞返輕舟
古木辭羣葉
微波映遠洲
涼

雲唳一鴈夕榜拂雙鷗酒散襟裾爽琴清徽玉秋因之
寫高致得似晉風流

題畫

我愛碧江淨輕舟點破秋西風捎鬢脚直得不梳頭

題畫

綠陰如水逼人清深葉黃鷗坐久鳴一箇樹根非八坐
白頭箕踞有誰爭

京口待渡

鐵甕城邊鮓酒香
行人下馬立斜陽
渡頭船子隔岸繫
三老攤錢他自忙

題趙松雪畫馬

隅目晶瑩耳竹披
江南流落乘黃姿
千金價重無人識
笑看胡兒買去騎

題畫

滿地綸竿處處緣
百人同業不同船
江風江水無憑準
相並相開總偶然

題芭蕉贈僧

山僧心與跡俱閒
未限居山及出山
長對芭蕉閒不過
時留一偈葉中間

題畫

我本前身鶴上仙
人間罰住一千年
玉笙塵夢頭如雪
待得醒時海水田

仕女圖

鮎薄窓虛日映樓
杏花風蕩玉簾鉤
手擎粧盒偷微笑

紅蜘蛛絲在上頭

題柯博士敬仲竹枝

楚烟吹濕碧琅玕認得奎章墨未殘
莫問先生歸去事
江南春雨杏花寒

和吳匏菴東庄結屋種樹韻

倚郭緣濠此卜居陶翁莫怪詫吾廬
夾隄楊柳行油幕
偃架葡萄看草書

題畫

草房仍着薜蘿遮地拗林深獨一家只道東風吹不到
門前依舊見梅花

題畫

清暑茂林風日好兩翁談屑落高寒白雲故故沒行徑
要絕世人來此山

山逕蕭蕭花木疎小橋流水限林廬秋風黃葉少人迹
雞犬不聞惟讀書

題畫

芳時中酒病難降朝日烘人始啟窻可怪楊花輕薄甚
盡扶春去落煙江

聞楊君謙致政賦此以致健羨

春官司署儘能閒猶道勞形與病關身在早朝霜馬上
青青殘夢是吳山

都門祖帳百花飛多見龍鍾賦式微較取柳條千萬折
可曾送一少年歸

題牡丹

名牌新樣紫牙刊露重煙深正好看却怪錦雲低亞樹
帶風扶上玉闌干

朱翰

字漢樵成化中布衣嘉興人

擬長安即事

鶯啼燕語滿長安況是東風積雨乾幾處樓臺成落寞
九重宮闕倚高寒花飛漢苑春將盡人去秦關路正難
媿我虛名何所用十年身世此盤桓

擬宿淮浦寄司空曙

孤舟迢遞獨南行
向晚那堪駐客程
遠火隔江人未宿
驚禽啼樹月初明
天邊雲繞金山寺
浦口潮通鐵甕城
惆悵萍蹤幾時定
與君相對話離情

有懷古蹟

蕭蕭落日起悲風
陳跡荒涼四海中
五柳門前松徑沒
百花潭上草堂空
酒船何處尋楊子
丹井無人訪葛洪
今古茫茫愁不盡
欲將長劍倚崆峒

客窻秋夜思親有作

絳河流影入虛堂
天宇空明夜色涼
幾處清砧鳴落月
誰家殘笛度微霜
摩挲舊歷秋將盡
展轉寒衾漏更長
此際雙親魂夢醒
想應憐我在殊方

句章陳昶見訪

山中露坐學鳴琴
故舊重來百感深
千里寄書猶在念
二毛侵鬢各驚心
窻臨水月涵虛影
花繞池臺散夕陰
自古窮通有遲速
莫因相見嘆浮沉

夜雨中客中寫寄徐以舟

酒醒賓館夜將闌欲賦悲歌思渺漫上國有懷身未達
故人何事見猶難東風斷鴈鄉書遠細雨孤燈客夢寒
自笑當年心尚在重尋寶劍倚床看

早秋寓懷寄故園諸君子

晚風黃葉墜梧桐節序催人鬢易蓬故國逢秋嗟我遠
異鄉看月與誰同涼生羅幕初歸燕露下瑤天欲度鴻
却羨季鷹尊興遂片帆先已到江東

述懷寄呈以寬諸昆玉

獻賦論兵志未移蹉跎已過少年時
九霄失路憑誰引
一劍防身許自知宿酒謾因愁裏醒
故人多在夢中思
樗材此去應無用欲向商巖學采芝

冬日閒坐因懷故東秋巖翁

曲巷深沉戶半開夕陽黃葉滿蒼苔
空懷地主時招飲
賴有隣僧日往來金勒未歸遊子騎
香醪且盡故人盃
鱸魚只隔江東路不待秋風也自回

登郡城樓有感

孤城高處接清虛
落日登臨思有餘
陸贄忠魂宜廟食
買臣遺址變僧居
樓臺綺麗全勝古
風俗浮華不似初
惟有鴛鴦湖上月
清光依舊照芙蕖

遊白蓮留題清公方丈

上方臺殿好遊行
歲晚來尋物外盟
僧喜笑談忙具茗
客慙貧賤懶通名
疎林小徑稀人跡
落日長廊有磬聲
媿向迷塗空白首
欲從支遁寄餘生

庚子除夕

爆竹聲殘尚未眠兒童喧笑一燈前驅儼又見頒新帖
守歲何妨坐舊氊每見此生逢此夕豈知明日是明年
殷勤一盞屠蘇酒欲奉慈闈不敢先

送石憲還山中

一燈風雨夜窻深把酒長歌淚滿襟楊子自憐成白首
鍾期誰為鑄黃金百年貧富知交態萬里扶搖負壯心
從此已無塵土念欲隨君去卧雲林

送張廷範還應秋試

紅亭酒盡客初行，萬里青雲一劍橫。
折桂尚期秋共籍，望鄉無惜早趨程。
舟經笠澤吳謳起，路入秦淮漢月明。
後夜相思重回首，不知何處聽鐘聲。

送吳叔禮上舍還雙溪

越羅衫袂淚痕斑，愁向天涯送獨還。
芳草有情隨處綠，白鷗無事傍人閒。
東風一棹緣溪轉，落日孤城背水關。
見說飛騰霄漢近，不應歸去卧青山。

送百戶乃子北上

將門才子最風流報國心勞賦遠遊翠袖隔花歌舞散
青山回首別離愁花深野戍晨吹角月冷江橋夜泊舟
此去玉門關外路等閒談笑覓封侯

送張廷範還鄉

殷勤斗酒別離間一曲勞歌慘壯顏秋水白鷗經野渡
夕陽紅葉望鄉山五雲宮闕雙龍繞千里風煙一騎還
此後定期纓冕貴未知何處得追攀

代送鄭公子還鄉

與君遊學共淹留何事年來憶故丘
把酒慙為吳苑別看花還擬曲江遊
孤城日晚吹譙角遠戍烟開見驛樓
自古有才須有用莫因分手動離愁

送張廷哲還金臺

過雨溪頭踏軟沙送君千里上京華
江南明月離賓館薊北紅雲近帝家
花落堦塘春水漫人投村店夕陽斜
誰知此去相思意兩地青山入望賒

送人歸陝西

從容文彩壓騷壇江海逢君始識韓白社清風幽賞集
青山明月異鄉看乾坤故態雙蓬鬢魚鳥閒情一釣竿
歸去長安尋舊隱任教先達笑彈冠

送陳味琴

江城月曉度疎鐘有客將歸恨轉濃千里烟波成遠別
幾時尊酒重相逢水邊花落聞啼鳥天末雲開見亂峯
安得此身無所繫遠隨君去覓行踪

送人還京口

西風海國暮寒生，千里思歸倦客行。
舊路獨尋京口驛，中流遙見石頭城。
江涵鴈影秋天遠，樹帶霞光夕照明。
別後此心還念我，莫教烟水冷鷗盟。

送裴璿還應鄉試

沙頭酒盡惜分攜，千里鄉關醉不迷。
落日解鞍投古驛，曉霜欹枕聽鳴雞。
青山路遠人應到，碧樹烟深鳥謾啼。
去去莫辭頻涉險，九霄平步有丹梯。

送人往浙省謁兄叅政

公子西行度浙河蕭蕭琴劍欲如何
津亭落日勞相送
薇省春風喜獨過
烏外青山開卷畫
雨餘新水漲江波
長才正好為時用
未許還家掩薜蘿

送朱元魯還新安

天涯相見惜離羣
重向津亭話夕曛
此別一尊須盡醉
明朝千里又思君
帆隨斷鴈投荒浦
家在寒塘掩暮雲
歸去若逢知己問
為言垂老尚無聞

送徐德輝還包山

天涯故舊惜多違
幸得逢君又憶歸
岐路不堪分別袂
雲山何處訪荆扉
江頭積雨催花盡
烟際孤帆逐鳥飛
明日空齋對尊酒
使人情思欲何依

送世安還隆里

鄉山迢遞掃松餘
復向天涯訪舊居
萬里不辭歸路遠
百年那忍故情疎
秋臨楚澤鴻飛早
霜滿隆陽客到初
嗟我一杯離別後
平安惟有寄來書

送包山馬世用遊湖廣

鯉魚風急布帆輕
酒盡離亭思不勝
明月幾時經漢口
青山何處是巴陵
擬勞鄉信憑秋鴈
誰與蓬窗坐夜燈
會晤未期滄海遠
曲闌從此為君憑

送郭仲經還趙郭

同醉高堂已十秋
偶來相見得相留
對床風雨情如舊
回首雲山思益愁
哀柳斷橋逢小店
片帆斜日到滄洲
若為離合皆如此
百歲逢君幾度遊

送陸寅博

嫋嫋涼風吹雨晴酒闌歌罷送君行鄉音漸到秦淮別
月色偏於楚水明數點青山迎去棹誰家茆屋傍孤城
相逢莫謂輕遊覽司馬從來少宦情

寄友

曾尋烟月到吟壇把酒高歌欲自寬白首共憐知己少
黃金誰為結交難殘燈燄逐更籌盡落葉聲兼夜雨寒
今日滄洲成獨卧若為南望思漫漫

寄姑蘇莊適庵主

優游泉石與襟期惆悵年來久別離江館夜寒詩夢遠
海天雲冷鴈書遲交游得意多先達霄漢無媒獨後時
何日逢君對尊酒細論懷抱慰相思

寄姚會川

曾共高齋聽露蛩別來惆悵不相逢春風楊柳添新恨
秋水芙蓉憶舊容富貴未期甘守道萍蓬無定惜浮蹤
何時得遂思君念剪燭西窗話夕鐘

寄伍公矩太守

故鄉烟月舊同遊
別後空驚兩鬢秋
書出楚江悲斷鴈
夢臨湘水憶盟鷗
馬卿卧病仍耽酒
王粲思歸謾倚樓
誰似歲寒情不改
還題尺牘慰窮愁

次湯公著韻

風塵荏苒歲華深
撫劍蹉跎報國心
白屋坐來芳草歇
青山歸去斷猿吟
功名此日羞看鏡
故舊何時喜盍簪
一曲清歌渺天地
水流東去日西沉

次友人韻

夕陽流影照高臺此日登臨眼界開
估客半從吳下去風帆多向越中來
青山歷歷渾如舊荒塚累累謾作堆
回首欲尋東海去弱流三萬隔蓬萊

次吳菊西韻寄邑掾

關山渺渺路悠悠回首青雲憶舊遊
明月幾回江上夜清砧無柰客邊秋
百年流水心期在半壁殘燈夢寐愁
若遇蕭何能薦士未應終老漢溪頭

次沈希豫竹林倡和韻

清時無事樂雍熙物外幽尋也自宜山寺有僧留共飲
石枰無蘚坐彈碁日斜茶塢鶯啼緩月上松林客散遲
記取琅玕題字處明朝來此重論詩

次以寬春日久雨韻

春來風雨嘆淹留轉覺寒侵季子裘茅屋幾家疑斷火
野塘無處好移舟雲低遠樹迷荒戍草沒平沙漫夕流
明日晴光還似舊且乘羸馬覓交游

和答蔣文藻

夕陽樓閣倚層空日日懷君向北中
醉去不知身在客別來殊覺鬢成翁
烟蕪際水浮新綠風藥翻堦墜晚紅
有約明朝溪上路買舟時與一尊同

和周草庭留別姚廷遠韻

溪頭斜日映流雲見說相逢不忍分
賓從豈堪催客去棹歌猶自隔烟聞
愁中夜雨懸吟榻夢裡春風對舞裙
那得此身閒半日酒船何處亦尋君

石倉歷代詩選卷四百九十一

欽定四庫全書

石倉歷代詩選卷四百九十二

明 曹學佺 編

明詩次集一百二十六

祝允明

前緩聲歌

瑤川遵穆晏汾水從軒游玄王啟靈會道官亦交酬蒼
禽咲金支瓊鸞翥絳幃靈賓戛韻石子登引空謳聖日

麗萬舞祥吹振清球川后迎皓蜺波臣趨翠虬湘姬偶
芳席巫女行玉羞天老獻秘文聖年無時秋

董嬌嬈

京洛何迢迢紫衢通麗譙采桑誰氏子不解意飄搖強腕折高
枝卑指攬柔條詎知枯殘日不愛彼穠朝何當華堂上儷瑟歌
此謠此謠固君情不移芳與彫吾將持贈子閒是董嬌嬈

隴頭樹

隴頭多嘉樹君持作梁柱清晨覆賓相白日抱歌舞哀

哉北邙麓日日聽人哭

隴頭水

流水出隴頭白日亂高樹四海遠深淵原泉日夜注不見人物景獨向東流去

吳趨

閭闔紅樓起臯橋淶水迴綺羅搖日麗車馬逐雲來施旦非吳艷機雲是晉才欲歌遺古調風俗轉堪哀

雜詩

滔滔川上水暮暮隄邊草行行遠方客歷歷山下道
遠行易疲白日坐已馳無憂白日暮祇恐嚴霜華日暮
行復朝嚴霜草以彫

其二

天天南國子聲伎妙入神審音類子野歌舞傾都闐城
邑不足留引領奉韶鈞浮雲翳廣路且與閭里親倡家
日還往哇淫累其真簡兮前上處謂言不足珍樂府久
隔絕繁籍猶相因嘯詠且自樂亦以共嘉賓

述行

人理有大合大合及茲辰東楚當星戶虹梁就鳥津彼
其行結幌予亦御周輪從雲來粲者卷醴合良人永始
承遙緒昌圖啟後珍慷慨山河誓與予並千春

又

六極兼弱貧百罹萃凶孤素薄綜物懷坐為鄙人圖倉
箱既涼匱米鹽務鎔銖自持稿桐姿埋沈向泥塗

又

讀禮訖祥禪試琴成笙歌丘墳肆畋狩志行窮琢磨天
人貫麤微昔今紛網羅大道彌宇宙眇薄將如何

又

先人有高樓遺我端居室幸無喪志物塞楹簡編集皇
仁植丕訓予氏張萬術閉關斷來鞅庶以究昕夕

又

學聚勤殖藏息游解紆結寬原或流行激泉共甘冽攀
條采碩果循畦屏哀葉幽禽答遐韻候蟲依氣節芳靄

蒙晨榮明輝揚夕月拔時附絕駕塞兌謝塵轍

又

芟芟抱微稟自擬猶萍蓬企瞻先哲民終羞絕蘿松追
隨不越羣何足為不同何為蕩蕩世亦復此不容無悶
見君子先師嘗發矇平平王道間萬厲頻交攻苟無反
躬術何以禦諸兇皇仁卒全物莫高匪玄穹

又

疏單勿復道幸抱此高襟妙鑑既弘照大車亦雄任如

何覆載洪行迹復淹沉孤征即長道纏綿荆莽侵焉能不跼蹐日月坐以深

又

素無經世懷學仕本先訓終然拙杌鑿株木醫久困渾玄常有期或合阮君遜元龜幸垂兆長往乃無悶

又

壓榆樊石扉堦垣卑四周前楹舒廣場後宇環澄流微淪帶山趾半覆花竹幽長夏宜游浴高蔭終日休豈必

商丘間點爾聊同遊

又

清晨風候淑引策出郊郭青黃交遠疇循許桑沃若白
雲被華岑飛澗濯幽壑汎眺思累新冥會神逾廓命儔
賞已豪孤尋寂倍樂

又

遙賢故懷益密哲重應欽四海三數君垂眷後先深年
位非所限存沒或殊今淵淵玄酒味粲粲瑤華音懷哉

以拜嘉畢世銘卑襟

又

鳳鳥不見世四海以德稱虎豹伏深山雄鷲乃馳名日月遞經天夕伏亦沈冥目趾待成功誰不仰其名所以孔仲尼君子寂無聲嗟予塞淹留閉戶乃浮名高卑共彰徹近遠均一鳴惟憂邦必聞求之無其情

又

六籍統宇宙七緯鍵天人百子錯町畛萬家騰烟雲眇

眇予日接泳洽如淵鱗冥蒙日思道繁發時摘文紛綸
向一貫光彩摩三辰向來覺性言寂寞難重陳至樂終
百年與爾同埃塵

和陶淵明飲酒

明時耻韞玉抱策下丘山所獻幾何許腐義數千言有
司繆甄錄一出踰十年身世兩無補何物期自傳士生
三代後干名本其情所歎少可知科版獵空名二者齊
亡之何以為此生此生幸長存得失寧復驚陶公但飲

酒千載名自成

又

客來相話言言多非與是問我誰適從我不識譽毀幸
客來相過惟能默飲爾隨意翻瓦盆不解彈綠綺秋霜
瘁榮木春露華槁英逝者不能已愛憎誰為情吾生四
十年強半居歎頃不知誰為之孰為相號鳴局促百年
內安足稱達生

秋懷

時運無長榮清商多悲音悲音一何苦壯士有遠心蕭
蕭風篁亂瑟瑟蚺蜥吟寄言春萬古託之千霜林潯陽
有餘波涯岸倘能尋

己巳閏九月十三夜夢中為游山詩

春觀入西岫區名意自別松嵐結幽賞蟲鳥弄餘悅花
氣韻蒼沈樹膚落翠雪天行無塵染丘臥自雲潔心在
道不違未覺萬物裂三爵已餘酣清心寫泉月

春日醉臥戲效太白

春風入芳壺吹出椒蘭香累酌無勸酬頽然倚東牀仙
人滿瑤京處處相迎將攜手觀太鴻高揖辭虞唐人生
若無夢終世無鴻荒

別唐寅

長河堅冰至北風吹衣涼戶庭不可出送子上河梁握
手三數語禮不及壺觴前轅有征夫同行意異鄉人生
豈有定日月亦代明毛裘忽中卷先風欲飛翔南北各
轉首登途勿徊徨

雪後楊禮部邀宴用謝宣城韻分得濁字

季冬雪始降佳氣通歲朔君子良燕會時哲總延擢揖
遜繁賓禮登奏鬯嘉樂蘭薰互霑襲松栢齊卓犖遐覽
萬物昭無復見照濁微言共一契所寄在綿邈

怨詩

繁霜隕哀秋萬物一無歡后稷苦望歲仲尼唱猗蘭東
海有愁龍西崖有鸞鷖文王舊時操極古無人彈

舟行汶上看月

璇蓋瑩空青飛鑑泛華艷川原邈夷曠疎木媚寒欲廣
路斷浮鞅旅翫諧靖念跡逝偕志行萬里靡坊塹苟無
趣操持誰能勞不厭

夢遊

航葦緣曲谿峽深谿轉幽澄靚水氣甘蔥蒼木蔭稠空
朐孤持檝愈入世彌適步履窮豎亥祗此適余丹蟲鳥
元共性非契我何求

龍川山中早行二首

磻磻左山影橫截右山腰辨色鳥謹翔微元漾晴朝浮
雲若中斷蔚蔚方行遙

朝雲山腰生我在雲中行只恐雲載我飛上白玉京世
塵邈已隔天難猶未鳴須臾微風發東極金烏升

吉湖口湯泉

暮詭適修禊嘯侶閱靈淵機權知匪測橐籥詎云偏感
沸連波起鴻臚不斷燃蓋石愈怪傑襟湖何渺綿蕭丘
有寒燄化理同一玄燧人與堯井無為帝力全

漂水官舍

皇州本荒麗倖府亦多暇高木停車蓋白石砥根下雞
犬寂不聞明窻晃低亞磬奏不絃琴山橫無筆架流雲
過簷牖斜照盪書畫巖居固同此此寓未稅駕

出高淳縣望寶積寺塔

巖邑無閭閻出市即郊隰淒涼木石寡衡縱畎澮襲微
陽廣土被厚霰蔓草浥四垂天茫茫忽覩斯獨立檀欒
布牙角亭突樹磴級卑壓蒼翳叢明標粉黛及遂疑屢

井絡仍謂賢聖集
旋行通復遐
窺戶廓沈戢游
煩少解
散空諦亦叢反

夏日林間

空林坐遠暑松蓋
載炎日重陰集
涼氣薄吹颺亦
及幽禽時度語
逢澗汎清瑟
厨人列齋素
稚子來供食
援琴弄山海
頗復似加適
牛羊下前山
自入後簷息

汎舟登郡西諸山作

西巖蔚春氣丹翠
絢長靄結駟出
閭門日華浮羽
蓋曉

市奏萬響方言九州會青翰迅妍洲遙遙背城邁中流
簫鼓鳴連疊夾隄起鶯吟芳樹間鷗舞澄沙際柳阪少
依依花溆始綵繚逶迤度重嶺宛轉入蒙蒼欣遭勝域
奏慮遣俗累解薄暮風詠歸華月漾玄瀨鳴笳震水關
登陸且迴憩遨翔許可樂來往日月代

秋日作

危陽既驕夏霖復傷秋夏驕衆夫病秋傷田畯憂少
壯且頽墮耆人束百愁萬物蒙化成聖賢豈有謀栖栖

非為佞駕言我焉求

答黃魯曾

昔與君子別朔雪正霏霏
惠音阻良覲歎息避炎威
偃卧懷夙昔風雨淪淪淒
淒磊磊井上松秋菊晚相依
倏忽時候變星霜迅若飛

挽歌詩

清晨出閭門丹旌何處翻
問之路傍人新鬼即有墳
翹望旗中題知吾夙所敦
昨朝華屋間啞啞相笑言
日月

畧流轉幽明已異門昔時強仁義茲辰聲益尊屬徒送
自返婦子亦一喧君獨長甘眠不知悲與歡由茲壽無
垠萬秋如一昏零霜殺宵草繞山遊微魂遊魂不復貴
所慰行節存

寶劍篇

我有三尺匣白石隱青鋒一藏三十年不敢輕開封無
人解舞術秋山鎖神龍時時自提看碧水蒼芙蓉家難
未須割屠蛟或當逢想望張壯武揄揚郭代公高歌撫

匣卧欲哭干將翁幸得留光彩長飛星漢中

宮觀

青霞抱琳館蘿陰絡深逕龜遊煙沼煖鶴立天壇淨微
香拂幽洞欲覓風不定雲房並縣簾晝日鎖虛靜琪殿
臨高臺時聞落瑤磬循除步周匝徧扣無人應

太行歌

上客坐高堂聽僕歌太行六歲從先公騎馬出晉陽逢
循厚土足忽上天中央但聞風雷聲不見日月光狐兔

繞馬蹄虎豹嘯樹傍衡跨數十州四面殊封疆童心多
驚慄壯氣已飛揚自來江南郡佳麗稱吾鄉邈哉雄豪
觀寤寐不可忘

題隱士山居

志士果藏隱勝境合冲閒冥冥討幽蹟息躬構深山青
蘿施欄宇循除鳴流湍緇韋積皮几時衡素絲彈出郭
便無累何煩嵩華艱危岑寄遠氣屹矣不可攀

家藏馬遠春山行樂大幅

淑候媚川石初景澹林霏扶藤循石坂楊柳共依依朱
絃卧行襟隨往抱希微無論遇高賞器在道無違

神遊篇贈黃勉之

帝遣河上公下來赤縣遊采真金庭房漫衍三十秋禹
書眇一策詎幾窮沉幽蘭香悅亦感安能久綢繆回首
視泰元紫烟覆神州壘落結五九杼軸冥交鉤內笈千
神鈴星雲表沉浮猿鹿總千歲桂姿無年休雨露黯在
下日月環輪流憶昨鷁上客招邀翫滄丘子既夙覲之

飄然躡霞輶長歌我勸駕神偕足孤留金鳥鳴日觀玉
女呼洗頭三壺風帆迅弱水不容舟隨風唾珠玉空徧
莫能收聞有金光草竈墨無所投井攀星辰宮忽恍垂
前旒長跪問寶章八荒極探掇一餐換塵骨萬品皆蟬
螭與子無往來逍遙齊所求

清溪宮夢仙吟

都邑聲色區此有蓬蘿風黃埃不入門十月清溪宮幽
閣掩竹牖舒足眠高春隔林羽衣人焚香鳴槁桐微火

紫肩沈綠塵婉空濛淒絃汎寒飈引聲入雲中吾不解
世曲聊與神明通思借大鯢翼小戲滄海東微暝已復
來客調猶未終

答孫山人一元寄吟卷歌

秋風落葉露為霜美人去我天一方只知朔鴈翔南去
寧解魚書可寄將分開尺素雲生手濯濯芙蓉倚楊柳
金丹煒煒伏鼎竈寶劍時時拂河斗仙韶本是清都樂
欲奏人間舞羣獸去年送別吳王臺屐齒微蹤長綠苔

相思每望秦川月寄信俄逢越使來越使能寄書不知
書中意何如君能寄詩卷不知我腸車輪轉李白上天
鮑照沒此聲何處君留得霞為衣分月為澤金光草分
換君骨二子雄風不可尋九霄星露夜沉沉但看一片
千年月懸向青天照我心

俞漢遠雲山圖

洞庭之南瀟湘西濕雲從龍凝不飛九疑縱橫不可辨
二女望斷重華歸山河茫茫都一暝仙宮隱入層霄迥

水滸渾迷行路蹤雲端忽露青楓頂披圖亦覺亂心曲
嗟爾良工意何局人間晴雨相倚伏祇在君手一翻覆

戴進風雨歸舟圖

黃陵廟下瀟湘浦西風作寒東作雨鷓鴣啼舌到無聲
誰管行人望家苦柳州刺史幸不違長沙太傅音塵非
翠蛾斑管在何處萬古重華呼不歸

暮嶺歸樵圖

吳山嶺頭風蕭蕭吳山落暉紅抹腰蜿蜒鳥道自能認

只在中非市朝燒薪煖酒換魚煮五十行歌氣如虎
朱翁側足金馬門吾儂未舍無媒路

將歸行

老龍渡頭秋欲歸炎州霜輕葉不飛江東遊客未授衣
擁衾支枕歌式微自余之來日三北燕吳萬里稀消息
高堂夢轉眼冥冥山圍蜃船天潑墨南溟有龍不可屠
北山有虎不可誅鴛鴦相望懷慈烏況又嶺南多鷓鴣
題徵明寫贈潘崇禮灌木寒泉大幅

具區之水被三州洞庭之樹千萬數沉森浩漭天下奇
灌木寒流此何許潘君抱朴山水人策杖行徧滄浪濱
陽崖衆目悅暄媚忽逢陰壑如有神禹鎖老龍鐵索絕
拏雲怒雨出洞穴木號水呼竹石裂衆蛇從之互盤結
蛻骨戍削雜鱗鬣颺留風葉枸株膠急流抨撞石罅躍
珠跳汞走闢澆潏微茫上析河漢注奔赴繞若方丈脚
山鬼伏窺木客泣欲據恐被山伯扶仙老時下憩濯足
而晞髮招潘君兮吾子來共千歲以一一息潘君歸語

衡山氏仙之人兮不可以久留吾恐一往境俱失宣州
兔肩毛勁如石深蘸金壺玄玉液閉門夜半役鬼工條
忽移來宵無迹

丹陽曉發

京邑到來熟曉行如赴家月明人渡水星散樹驚鴉燈
影依依店茶聲遠遠車蕭騷兩秋鬢無處定生涯

旅情

旅食慙工部分攜念孟光歲時臨俎豆風露警衣裳滿

月當春面明霞見晚粧情懷宜自遣看是買臣鄉

江行

渡口人爭發出江舟已微鐘聲離岸小帆影逐星稀
鴈連雲度寒潮伴月歸蒼然山一帶隱隱伏長圍

自末春入初夏歸舟即事

往往花移色交交鳥換鳴雲將京國遠水別衛河清
高嘯迎風轉低眠看樹行殷勤吳郡酒還得此時情

醉

醉來中歲裏那復有童心祇覺忘人我何為更古今
山河秋兀兀星露夜悵悵惆悵惟陶阮懸知磊砢襟

循州春雨

物候逢春好春來悶轉深山城十日雨家國百年心
吹饒生冷鬢雲易結陰循州元謫地何待此愁吟

漢室

漢室咸陽建山河百二開甘泉芝草出天馬大宛來
宣室宵衣問長楊獻賦回寧知天祿閣不用子雲才

滄浪池

出巷少人烟
林霏四望懸
冷光涵曲徑
沉綠漾平連
古寺依文殿
高城瞰野田
每經思版築
忘世更懷賢

錢塘玄妙道院夜賦

枕席錢塘館
更時未北還
每當身作客
轉覺意能閒
雨氣橫秋海
潮聲入夜山
道人看默坐
應笑鬢毛斑

與沈二少剛秋寓建業山院夜話

倦迹憐司馬
清風遇隱侯
鄉關不堪問
文酒且須酬
水

壓吳王國山橫建鄴秋高臺仍可喜重見鳳凰遊

暮春山行

小艇出橫塘西山曉氣蒼水車辛苦婦山轎冶遊郎麥
響家家碓茶提處處筐吳中好風景最好是農桑

舟行守風阻險輒睡酣適成詠

行役安危定心閒常自如每當驚濤瀕偏得訪華胥適
逐牆頭蝶清涵水底魚覺來何以遣枕畔一堆書

友人郊墅

孤墅倚高原扁舟晚到門
琴聲虛草閣月色滿江村
霜落魚蝦出烟收花竹繁
不須燈下坐臨水好開尊

艇子

江南小艇子能住亦能詩
梁柱無階砌門窻即枕帷
坐流看樹過行屋逐風移
試欲作舟史半生居在斯

峽山寺

靈區苦不到到亦苦詩難
景象絕聞見怪神如等閒
地將海作帶天借石為闕
何事仍堪恨塵生游子顏

足夢中句

遠公蓮作社陶令柳為門止酒用卿法攢眉吾不言白
雲時或散黃菊故應存二老皆寂寞千秋誰共論

廣川城

皎月浸嚴城蒼蒼百雉橫木梁縣絙下竹柝夾輦鳴水
部從時飲山人入夜行因思趙公子封邑尚垂名

題湯三城南莊子

喜樹夾茅堂城南十畝莊竹窻遙列岫花溆密圍墻兔

捷且施路魚肥苟在梁每來無世事祇覺道心長

昆福寺

壞閣尚岑崕寒房繞寂寥木撐危殿角草出斷碑腰門
鑰凝塵滅香爐火氣銷竟空惟佛觀亦有榮彫

白蓮寺

臺殿切層霄丹霞遠建標名傳白蓮妙年紀赤烏遙迤
邐城連郭廻環水貫橋重來擬分榻塵慮未全消

滄州姚家涵碧閣

寒塘帶州廨幽趣似郊坰樹影倒浮綠天光平漾青石
渠方似矩板屋小如舲相對只魚鳥濠梁同性靈

三月三日施侍御邀宴姚將軍莊宅

日影迂龍轡春光溢鳳城繡衣乘暇出翠幃逐空行姑
蔑金盤露郎邪石首羹簪纓雜巾褐莫遣野人驚

金華見山亭

郡廨當空立林亭面爽開窻中列岫遠江上送青來京
兆眉長嫵陶公菊自裁安能乞勾漏把筴此徘徊

隱者

白石薜蘿房青山雲水鄉
琴傳雷氏斷書是汲丘藏
鹿友同無我蜂分亦讓王
枕中藏雅道一卧即羲皇

贈董五寬

邵南今隱士園北有幽居
出市或賣藥閉門惟讀書
白雲媚脩竹嘉木蔭青渠
見說新成賦題名後遂初

贈隣院深上人

竹院名童子茅齋坐已公
亦如王舍內却愧魯家東
共

味井泉接分陰樹影中間眠時偈和律呂隔牆通

題人園居

未必丘樊好幽居趣自深
遲行避小草高卧託喬林
抱灌惟知甕揮鋤不見金
問渠終歲裏曾有惜葵心

靜女眠春曉

陳月元非璧荆雲本是人
抱衾辭永夜失枕卧嬌春
嘶馬應南陌流鶯在北隣
城隅如可俟無事夢含顰

謝道士挽詩

雲房覆清址猶自鎖虛寒
耿耿鶴一隻蕭蕭竹數竿
友人留藥餌弟子代替冠
欲續周師傳傳師與衆看

顧明府榮夫

雞山燕市每依依此日都拋入洛衣
家近鬱林公舊隱門如彭澤令初歸
空憐舊社惟君密却笑無車訪我稀
甯愛滄浪池水好幾時同坐一方磯

朱提刑升之

渚萍漂泊合江蘼並逐東流更不移
豈獨松篁能晚節

共拋簪紱向明時
烟霞草樹春容與
霄漢星辰夜陸離
慙愧逢人說桑梓
只如黃卷對光儀

閒居秋日

逃暑應能薺閉關
未須多把古賢扳
并拋杯杓方為嬾
少事篇章恐礙閒
風墮一庭鄰寺葉
雲開半面隔城山
浮生只說潛居易
隱比求名事更艱

早春江行

五十六年行役身
又漂萍葉及初春
柏燈向壁吟殘句

江雨敲窗夢故人鶯轉上林空倚翠月生南浦幾傷神
還家想得兒童笑毛髮蒼浪綠綬新

縣齋

縣齋孤坐覺澄懷未覺飛光兩矢催夜雨鄉關歸夢久
夕陽門院壯心迴非因做吏偏違俗且喜微邦稱不才
坐起忽驚詩景入西南山色隔城來

廣州別表弟趙二

海邊三載試琴才省問煩君兩度來天濶風鵬嗟轉徙

秋深霜鴈獨飛回計程驛路過江棹屬買漁簑掛釣臺
別酒多傾也能醉歡情不似故園杯

句曲道中

老至誰憐晝錦明春來聊得客懷清宵依星斗宮壇卧
曉入神仙宅舍行眼看山多城郭少肩挑詩重簿書輕
何時總入烟霞去不見人間寵辱驚

寶夢

牕外星河五鼓天香凝紙帳裏雲眠遙尋鶴夢游塵外

却怪雞聲到枕前，拱壁光陰悲此日。
懷珠奔走笑當年，知音總沒惟懷古。
卷裏相看共默然。

寓黃輕車宅雨後禁直歸因戲贈

黃昏冷雨濕金鞍，鞭箠提巡繞禁鑾。
星散羽林霜氣肅，天臨華蓋夜光寒。
鄂君去後余猶薄，京兆歸來黛已殘。
知有游人卧齋閣，一般飛夢出長安。

萬安道中

歷歷長亭過眼頻，浮家一舸日隨身。
江山不苦南征客，

星斗應憐北望人
劍匣只依書裏住
酒杯全亞藥爐親
牀頭歷日閒拈看
一歲無端半已陳

北郊訪友

風物幽妍上郭寬
訪朋因得一迴看
家家黃土牆三尺
處處清渠竹數竿
欲雨欲晴雲半密
如秋如夏汗微乾
苦吟應得山人句
却笑龍頭少鵬冠

宿茅峯

下馬門前一振衣
翠微高迥清微雲
邊洞裏真人去

月下山中長史歸丹伏砂牀金燄短水穿崖竇紫雲肥
神方能詠不能遇一夜爽靈風雨飛

宿攝山棲霞寺

泉洞迷藏草沒梯倚巖千佛坐高低疊襟山色周迴峭
隔樹江聲隱映齊宋刻梁文江令筆龍蟠龜戴上元題
棲霞只是枯禪宅爾許頭顱向裏棲

中秋日燕客晚雨

中秋美景當吳苑十載佳期共此堂珠履高吟歡滿座

金釵送酒看分行
荆娥妬月俄行雨
趙女停絃慢遶梁
莫道西巖容易墮
朱簾徐捲爛銀床

過鄭六升不遇

欲作春風上國游
尋君東海話離憂
烟波自翦西牕燭
絲管醉眠何處樓
五夜不逢黃憲面
百壺那解長卿愁
平生國士青君眼
老矣猶能一笑酬

答日本使

姓橘名省佐
相國寺僧

日邊來處幾何時
聞說占中復到寅
遙仰北辰趨帝座

卻經南甸駐行麾詩名愧動難
林客禪諦欣參鷲嶺師
回首山川渾渺邈只看明月慰相思

西臺伊公和贈篇次答

東野猶居郭外家閉門高枕數年華
秦人不敢窺干木
楚事休教誤屈瑕暑氣轉嫌秋
令溽樹陰偏受日光斜
鴛鴦過辱千金許慚愧酬知未有涯

與吳大用飲酒

世事浮雲幾變更鄰居長聽鳥嚶嚶
緗編俯仰閒今古

青眼摩挲老弟兄樹下送闔高嘯飲水邊睽袂細吟行
胸中三十年来氣終不銷沉負友生

贈孫山人一元

思邈先生不可尋紫麟騎下閭風岑宵眠華嶽星支枕
曉度關河月滿襟驚鶴夢殘飄露葉哀猿腸斷抱霜林
秦臺故有吹簫侶一片宮商萬古心

贈俞隱君

水南雄市萬塵趨水北還容陋巷居三尺素桐陶靖節

百篇華賦馬相如心拋世俗爭為事手錄時賢未見書
欲繼姓名高士傳恐君嫌我近睢盱

贈朱孝廉

百年貞白舊高樓傲兀風埃六十秋楚聘尋常來北郭
魯呼前後只東丘書抄滿篋皆親手詩草隨身半在舟
前輩風流惟此老天公多為後生留

題龍歸洞下有龍母嶂

千峯如帳瞰巖扉靈物何年向北飛潭底火符玄鐵簡

嶂頭金母白綃衣海多雲雨應長往壑暗藤蘿久不歸
洞外蛟蛇常起陸可能消伏運神機

神光山

山郭西南五里強翰林留得讀書堂漫漫古岫雲烟薄
寂寂閒陂草色荒數點遠村鉤望目一間空殿鎖斜陽
山靈試為鄉人問會許何年更有光

謁張文獻公祠

丞相祠堂曲水涯祠邊仍是相公家千秋若解收金鏡

萬里何緣枉翠華
門外擲牲兼絮酒
嶺頭松樹夾梅花
人間不乏牛仙客
長攬遺編費歎嗟

答史隨州經

楚雲飛墨下烟蘿
想見瀟湘又綠波
刀劍已知成犗犢
簿書何處問絃歌
照人顏色春風近
入夢江湖夜雨多
寫就卜居憑問訊
青袍今誤欲如何

道院樓子

重簷雄拔小山幽
妙景容居最上頭
風掃六窻塵盡去

鶴乘三洞客來遊高原樹古長依殿畫棟飛雲不礙樓
怪底霓裾浮沆瀣綠章宵拜石壇秋

贈太倉汪使君惇

德風千里掩雄州爭解長刀換乳牛共羨漢家封卓茂
且看夫子戲言游功名此去符龜印文彩朝來壓蜃樓
最是野人懷惠切一塵仍擬結滄洲

贈刑奎

襟懷灑灑氣飄飄遊遍名都歲月遙花暗燕臺春走馬

月明淮浦夜吹簫華顛相對舊盟在笑口一開塵慮消
更喜兒郎皆孝秀入厨甘旨足漁樵

金陵眺古

綠樹平蕪野燒乾西風吹雨打長干盤龍去後金釵餉
擒虎來時玉樹殘結綺閣中香爇歇景陽樓下水花寒
秦人豈識千年後終古神州真石磬

次郡太守望虎丘諸山

乾坤雙眼一空矜山色能令五馬停鹿苑尚銜吳子艷

虎丘重對白公青烟消碧落千峯出月浸嚴城萬戶局
不但登高能賦事四郊應省荷鉏丁

再挽子畏

少日同懷天下奇中來出世也曾期朱絃并絕桐薪韻
黃土空埋玉樹枝生老病餘吾尚在去來今際子先知
當時欲印樞機事可解中宵入夢思

贈承公

牆外西林是寶坊林間高卧有支郎定回斜日雲穿衲

吟斷寒更月滿牀
妙梵遠通潮隱隱
清陰分與栢蒼蒼
何時為取無生話
共了趺蒲一夜長

長樂贈陳叅軍

浙水兩岐非異土
天涯萬里又同官
吳江蓴菜皆成夢
庾嶺梅花且共看
立望星河秋耿耿
醉聞鐘鼓夜漫漫
人生離合真難定
明日清樽好再乾

春夜懷鄭河源

洞裏詩筒兩度過
河源君子近如何
甘棠畫永迷青野

芳杜春深覆綠波
兩地頗同多枳棘
九州何處奏絃歌
惟應知己情難捨
早晚踈鐘入薜蘿

海珠寺送王提刑

風行五嶠過三山
又得趨庭未是還
天下望公知已久
朝廷求治亦非艱
波澄番舶鯨鯢靜
筆倚騷壇草木閒
瞻戀清光惟此夕
月華休下海珠灣

又借韻自賦一首用呈諸公

纔到炎方又憶還
空歌遊子劍前顏
窮秋陽鳥遵遙渚

短景浮雲出故山，開被放衙星未沒。
推窗觀海日將攀，諸公總是藍田壁。
不棄他山老石頑。

送張掌教致仕歸臨江

青眼摩挲醉袂分，那堪客裏別夫君。
風情好似陶彭澤，官職常如鄭廣文。
渝水晚沙眠宿鷺，蒙山老樹映歸雲。
虛堂索句昏鐘靜，宦海潺湲想未聞。

贈觀僧

不知身到轉頭年，性子觀來已洞然。
鐵臼藥寒和月搗。

蒲牀脚煖踏雲眠
歸期笑計銖衣石
定裏閒遊寶筏天
要識來時同我相
一般門外水生蓮

贈道士

龍子遺將海藏方
換除烟火世間腸
三花樹頂千秋雪
七寶宮中萬杵霜
瓊管玉簫通廓落
碧文金簡佩琳瑯
松門晝掩烟蘿合
獨在峯頭侍紫陽

送洽住天王寺李弟請贈

權姿妙臘氣翩翩
應世機鋒自潁然
修習久棲三寶地

主維新屬四王天高臺曠苑宜舒嘯蒲座香牀好息禪
我為青蓮李居士揮毫題得壁頭篇

題徐子芳秋庭

孺子閒居與世忘蕭蕭深院映虛堂露溥玉榦桐孫長
霜飽金丸橘子香白板拄頤迎灝爽素絲橫膝答清商
知君不是趨炎客長嘯一聲天地涼

家藏劉松年小方

暗門終日痼烟霞寫得東南處處嘉湖上烟波志和宅

山陰風雪戴逵家老僧引澗穿新竹童子
和雲掃落花
揖客入門如有影石墻松蓋夕陽斜

小米山水

襄陽松藩未曾乾十里瀟湘五尺寬
蕉徑不禁苔露滑
漁策長帶水雲寒澄澄僧眼連天碧
澹澹娥眉隔霧看
恐為醉翁當日寫平山堂上雨中觀

簡楊三

不將黃土點心胸六十年來氣似龍
竹塢霜寒青鳳峙

芝田春暖白雲封
各看明月同千里
共對梅花又一冬
吳水吳山休負約
酒壺詩卷日相從

遊和山麻石巖

山和人亦和
垂暇集鳴珂
陟嶺美未得到巖
奇轉多交
枝樹礙馬一步地
旋螺成屋自麻石
作門惟碧蘿
瞻天隔鳥道
入地學蜂窠
樹向頂上植
泉從肩畔過
禽蟲馮
几住雲靄入
衣摩佛座泥
三級僧牀石
四阿西臨野
廣漠東眺徑
陂陀遠吹潛
生爽驕陽暫
息苛禱祈情
敬謹

樂業舞婆娑物穰用亦儉地危心不頗民風都似此吾
為爾陳歌

子昂小景五首

春山雨新沐
掩靄結濃綠
一葉金芙蓉
粲粲迎朝旭
漁舟何所至
兩兩鏡光中
泐汭春漲更
喜天無風
江亭小於艇
松子落滿頂
盡日無人來
流水抱虛影
晴陽破嵐暝
水色常春和
如何異人境
而有樵者歌
隔塢有絕壁
蘿扉對山開
客子何為者
能入深山來

長途

長途只是水連天
好景惟應月帶烟
獨有流鶯與飛絮
見來渾似綠窻前

京館聞鶯

天風吹出掖垣聲
瀏亮緜山午夜笙
錯認閭門折楊柳
一時飛夢滿江城

舟中憶續

功名爾自誇雛鳳
情愛吾猶媿老牛
悵望燕山雲海隔

曉風吹夢過滄州

絕句

白眼青天萬里心
門前世事正浮沉
日斜睡起無聊甚
獨倚闌干看樹陰

廣州戲題

生世投閒四十年
瘴江班頂試鳴絃
今朝也是為官日
白日青天閉戶眠

丙子重九戲題

行年五十壯游腸幾把他鄉作故鄉
萬里一身南海畔
幽窗獨看雨重陽

戲為口號

遠人羈客古今悲
昔日慵看惜別詩
六口一家分五處
爭教不作斷腸詞

看山

嶺海看山旅思空
歸來還入畫圖中
平生愜性仍知己
只有青山處處同

無題

亭閣樓牕取次憑東風不送笑歌聲山村水郭城西路
却放朝雲此處行

即景復為七言兩韻

臨水樹如朋合志隔籬花似女懷春護門村犬還驚客
親棹沙禽忽訝人

三月初峽山道中

春陰春雨復春風重疊山光濕翠濛一段江南好圖畫

不堪人在旅途中

宿攝山棲霞寺

枕上紅塵白晝深
眼開仍得息勞心
燈花暗入僧牀冷
山閣憑江萬木林

寄謝雍

謝家蘭樹有清芬
每誦澄江却憶君
想得山莊長夏裏
石牀眠看度牆雲

東園訪梅已謝

故里閒居憶美人
開軒延佇御周輪
兼旬病起殷勤探
玉鉤飄零徧委塵

武帝廟

柞宮馮几畫成王
淚落銅仙月似霜
王母不來方朔死
茂陵松柏自斜陽

贈楞伽院老僧

庭前栢樹手摩挲
世壽寧如釋臘多
何物與師相伴住
楞伽山色石湖波

送僧還山

十日雲封石榻閒
偶然飛出又飛還
送師便擬依師住
想看梅花欲滿山

送蘇瑾

柳枝不折折梅花
帶去吳中舊物華
白雪黃雲迷鴈影
片帆明日是長沙

無題

強笑爭禁別恨牽
病容憔悴性依然
梨花小院留人坐

羅帳燈昏夢二年

戲題東叔燕月之什

無限香雲不斷霞
鳳凰臺下謫僊家
丹山碧水桃千樹
不遇劉郎未是花

秋夜曲

明月深穿轆轤井
蕉梧戍削藏石影
房帷螢火入還出
綃被輕圍明玉冷

浩月

玉田金界夜如年
大地人間事幾千
萬籟蕭蕭微不辨
露繁霜重月盈天

梅隱居

平生不識人間路
萬樹瓊瑤鎖竹關
剛為索詩城市去
杖藜今始出孤山

南浦驛送周訓

放舟南浦草萋萋
子往東流我又西
怪此豫章城上月
清光十里共分攜

挽陝婦人

其夫商
吳乞賦

豈是中途失少君
斷琴殘瑟亂紛紛
梨花寒食夫君夢
知逐秦臺幾處雲

水仙

罷散天花下紫壇
露橫秋袂水鳴環
凌波欲接君王去
又恐繁霜不耐寒

含笑

如臯未射息侯亡
不作梁家醵齒妝
春色晏然花事好

肯將烽火誤君王

芙蓉兔

霜寒玉線亂秋衣
葉重花深草色肥
靈藥更無人肯餌
素娥應道不如歸

鵲鵲

長枕三郎作頌時
桂宮蘭殿重含思
寧哥可是知人意
小院梨花玉笛吹

葉翁武功鄰家有高松公為題松壽篇

手種長松已合圍
翩然騎鶴海天飛
月明露下虬枝冷
不見人歸見鶴歸

來禽畫眉

巫山朝雲隔翠波
仙禽無柰晚來多
風流只愛張京兆
日日章臺走馬過

徵明畫草

光風輕汎綠迢迢
氣煖烟和未盡消
想得美人簾底坐
月華斜漾翠裙腰

小景

濃雲壓嶺雨初至
密葉障林風更多
只有漁翁能了事
一枝圓笠半肩簑

絕句

忽見銀河水倒傾
森森毛髮不勝情
悟來只在空山頂
卧聽松風夾雨聲

雜題

秋浸具區天地寒
老崖垂脚怒龍蟠
仙人夜半騎龍去

木落潛窺古竈丹

江曲柴門日自關
夕陽丹檝斷萍間
寒流遠近長如玉
流過漁磯便不閒

五月江湖風雨多
釣磯平沒夜來波
深林中有揚雄宅
莫怪時人載酒過

花滿百花潭北莊
無人同出碧雞坊
因風竹葉浮巾翠
落地松花上屐香

石倉歷代詩選卷四百九十二